

Uunga siunnersuut: Nersussuit puulukillu nujuitsut neqaannik ilivitsunik aamma affarnik nioqqutissat 1999-mi eqqussuinermi akitsuutaarutsinneqarnerisa sunniutaannik nalilersuinermik Naalakkersuisut UKA2022-mi saqqummiussinissaat pillugu Inatsisartuni aalajangiiffigisassatut siunnersuut. Nalilersuinermi ilaatigut akitsuutaarutsitsinermi ataatsimut piffinnilu suliffissaqartitsinikkut sunniutit kiisalu neqinik igaannariangorlugit sulianik eqqussuisarnermut sunniutit ilanngunneqassapput. Taamattaaq nalilersuinermi nunatsinni neqinik tunisassianik suliarinnittarneq annertunerulersinniarlugu eqqussuinermik killiliissutaasinnaasut qulaajarnissaat ilaatinneqassaaq.

(Inatsisartunut ilaasortaq Mariane Paviasen, Inuit Ataqatigiit)

Akissuteqaat

(Aningaasaqarnermut Nunamullu Namminermit Tunngassutilinnut Naalakkersuisoq)

Aappassaaneerinnineq

Inuussutissarsiornermut Aatsitassanullu Ataatsimiititaliaq maanna isumaliutissiissummik saqqummiussivoq.

Naalakkersuisut allannguutissatut siunnersuutaat aallaavigalugu, ataatsimiititaliaq allannguutissatut siunnersuummik nutaamik saqqummiussivoq.

Ataatsimiititaliap allannguutissatut siunnersuutitut saqqummiussaa oqaaseqaatillu tassunga attuumasut Naalakkersuisut maluginiarpaat. Ataatsimiititaliap kissaatai akileraartarnikkut aaqqissuusseqqinnermik suliaqarnermi Naalakkersuisut ilanngunniassavaat.

Naalakkersuisut taamatuu oqaaseqarlutik Inuussutissarsiornermut Aatsitassanullu Ataatsimiititaliap allannguutissatut siunnersuutaa tapersersinnaavaat.